



## LA ARLeF E PROMÔF LA SÔ ATIVITÂT ATOR PAL FRIÛL VIGNÎT A CJATÂNUS!



Intai mês che a vegnin la ARLeF - Agenzie Regionâl pe Lenghe Furlane, e sarà presinte tes manifestazions plui grandis e preseadis de regjon, par stâ tal mieç de int, par mostrâ la sô intense ativitât e par pandi i temis dal plurilinguism.

Si comence cun trê apontaments impuartants za tal mê di Mai. Il prin al è stât a **vicino/lontano** - manifestazion culturâl che si

davuelç a Udin e che e ufris incuintris, dibatits, conversazions, conferencis, mostris, spetacui - cu la conference "Messedancis linguistichis. Contaminazions, ereditâts e prestits tra lis lenghis in Europe, in Italie e in Friûl!"

Te zornade di doman, domenie ai 19 di Mai, il *stand* de ARLeF us spiete ae **Fieste da Viarte**, te Mont Cuarine a **Cormons**, par dà informazions su la lenghe furlane e su la ativitât de Agenzie in tancj altris apontaments.

**Ai 25 di Mai**, des 16 aes 20 e je in program a Udin la fieste pe **Zornade Mondîal dal Zûc** e la ARLeF e sarà presinte cun zûcs di pueste intun spazi di pueste sot de Loze dal Lionel. Un event dedicât ai fruts ma no dome, imaneât ancje cul fin di educâ ae socializazion e ae agregazion cuintri dai zûcs di azart.

**Ai 22 di Lui**, te suaze di **Folkest**, il bancut de Agenzie al sarà presint in cjistiel a Udin te ocasion dal concerti de cjantautore canadese **Loreena Mckennit**.

Cul finî dal Istât al sarà il moment di **Friuli Doc** a Udin **dai 12 ai 15 di Setembar**, e di **Gusti di Frontiera dai 26 ai 29 di Setembar** tes stradis e tes placis dal centri di Gurize, doi apontaments jenfri chei plui impuartants in regjon dal pont di viste enogastronomic, e la ARLeF in chescj contescj e puatarà leturis, laboratoris, animazions par fruts in plui di *gadgets* e materiài informatifs.

Une lungje schirie di events che e larà dal sigûr a insiorâsi cun gnovis datis.



La Agenzie e je presinte sul teritori zaromai di agns cul fin di stimolâ ancje il dibatit e la riflessione su la ricjece linguistiche e culturâl dal Friûl. O vivin intune tiere pardabon siore che, magari cussì no, masse dispès o din par scontade, smenteants di trop che e je straordinaria

il Friûl al è une tiere multilingâl par eccelence, un simbol di pluralità, un lûc di incuintris e di convivenza. Achì, di fat, si fevelin storichementri cuatri lenghis, il furlan, il talian, il sloven e il todesc. Cheste peculiarità, che e fâs unic chest cjanton de Europe, e je un element di valorizâ e di fâ cognossi in maniere largje. La nestre ricjece linguistiche e je une aspjet simpri plui relevant e ogni ocasion e je buine par fevelânt cu la int, par promovî chescj arguments e par rispindi aes domandis di cui che al à gust di aprofondî cierts aspjets e, soregut, di sintîju part de proprie identitât.

Cjalait il sit [www.arlef.it](http://www.arlef.it), la nestre pagjine Facebook e il nestri profil Instagram par cognossi i detais su chescj apontaments, ma ancje par restâ inzornâts su dutis lis novitâts de Agenzie, e soregut... vignît a cjatânus!

